

摘藻堂四庫全書薈要

集部

欽定四庫全書薈要

集部

御定歷代賦彙外集卷四

五

欽定四庫全書薈要卷一萬七千三百六十三

集部

御定歷代賦彙外集卷四

言志

玄覽賦

梁元帝

惟陳之歲次旃蒙月建司空變凌陰之呂扇廣莫之風蕭子

褰帷九水作牧三宮乃盱衡而言曰惟天為大惟堯
則之惟地蓋厚惟王國之粵我皇之握鏡實乃神而
乃聖陳六聯於八則弘九職於三令運璇樞而御宇

執玉衡而齊政大矣廣矣無得而稱俯齟齬於軒羲
諒斗筭於子姒包河圖與洛書括龍官乎鳳紀超大
德於百王高鴻名於萬祀惟天縱於副后踰啓誦而
惟首旣倫儒於肅成復斷獄於長壽豈止丕莊屈膝
將令班鄭捧帟譬衢樽而待酌若懸鐘之須扣前踰
繫象之外聲高洙泗之右伊俯已之顓愚謬聯萼於
天衢筮東門而畫野創南國而分墟詔伯宗以為賓
誥內史而策書用分茲於茅社從侯服而俾予類金

獸以封建非桐珪以錫處爾其湘水之東即我龜蒙
魏甘露而分邑吳太平而定中鎮麟山之崔嵬傍龍
跡其穹窿金城高而相屬石燕起而依風豈連鑣於
分陝羨追蹤於二公彼琅臺之作守有彭泗之嘉名
殊並海之分地異魚石之所城經沈子之高墉蓋水
運之堤封謝禮樂之千櫓閱武騎之輟衝軾錦車而
前驚驅魚軒而繼蹤無復鸞歌鳳舞唯對綠柳青松
留吳宮之宿燕響平陵之夜鐘飛余轡而西征戍太

真之舊營鳴節鼓之金鐺屯戎車於石城戮滔天之
封豕斬橫海之長鯨每輟書而歎息景樹德之風聲
從王役於鏡中浮文鷁而載鴻經謝亭而帳飲想彥
伯之高風度五城而騁望見三冀之無窮故以飛雲
蒼隼白鯉青桐金吾舍利鳴鶴紫宮眺方嶽乎雲間
望赤坂之朱殷想真長之送別懷思曠之還山此檣
檣而方遠彼松舟而未閑倦旅泊於新丘同渭水之
不流或千人而並唱乍萬人之相鉤毀橋由於瑗度

鑿空資於仲謀睇三茅之靈祕懷九轉之仙記紫臺
石室之文青首銀函之字獨有披霧之心彌軫凌雲
之志捫殷碑之愴望挹延州之高讓井甃沸而蜚螭
勢崎嶇而低昂見傳巴之度曲開安歌之浩唱想觀
樂乎朝陽憶紆衣乎夕張迴余舫之美風聳余棹乎
雲陽彼桑梓之必敬况粉榆之舊鄉將遊目於五湖
乃浩覽於姑蘇臨閭門之跨水聳重闕而開都睇太
伯之卜祀爰避國於勾吳去西滸之樂政尊東夷之

楷模時渡谷水之陽尚想嘉禾之方壯慶亭於吳后
雄橋李於越王觀泉亭之涌波崖巍巍而峨峨張素
蓋而縈洲嶼馳白馬而越江施鼓洪濤於萬里曾未
動於纖羅及戾止乎東甌登玉筍與銅牛山東武而
遙集鴈南海而飛浮巖亭亭其似蓋氣岌岌其若樓
登舜橋而延首瞰禹井而淹留御史之牀猶在督護
之門不修雖濫同於借寇媿人瘼之何求皇覽揆余
之忠誠詔入謁於承明旣攝州於淮海且作尹乎中

京慕張生之摘伏挹邊延之勵精珥金貂而待問鳴
玉佩而趨庭兼三河及三輔總九緯乎九經揚王庭
之後選聞袞然於前則時濫假於中台掌邦教之觀
國乍南宮而薦士且右鄉而表德判辟雍之樂語辯
金馬之儒墨驅安車以騁望壯天居之麗極詳夫皇
王爰處本無定所堯都平陽舜在冀方玄王居亳成
周卜洛故知黃旗紫蓋域中為大天地之所合風雨
之所會蔭美氣之葱葱浮卿雲之靄靄聳梁山而成

闕縈長淮而似帶昔者甘泉暉章平樂未央凌霄飛
雨麒麟鳳凰九華仁壽百福明光玉階紫闈雕柱錦
牆木蘭為棟文杏為梁溫臺冬燠秋牕夏涼甲乙之
帳庚辛之枋未有祇園之右齊之仁壽用擬舟航長
為稱首日殿月宮金池珠叢七重迢遞千柱玲瓏虹
橋左跨鴈苑南通紫紺之堂臨水青蓮之臺帶風及
夫皦光未旭更籌曙促猶然陽燧之火尚執驪龍之
燭或帶桃花之綬乍響玄山之玉爰八命而建旗誠

非親而勿居應鳴鞞於龍角覆緹幕於熊車開轅門
於淮渚泛餘皇之容與吟紫騮之長歌奏玄雲之疊
鼓開右座而納文設左廣而投武旣風起而雲飛復
推班而拉虎泛樓船而鬱紆憶霸楚之雄圖悲騅馬
之不逝忘鹿逐之長驅豈烏江之天險資赤帝之神
符於是途經灌壘水分當利彼吳王之連和延魏后
之交質趙將軍之建節辛侍中之奉使亮鼎足其何
言限修江而為二泊九井而問津蓋六服之都會方

函谷之設險譬魯陽之襟帶觀棄繻之裂帛見高車
之輔軼顧濡須之故壘每當食而忘飯鬪二虎於江
干爭兩龍於修坂旣凱捷而來旋遂鳴鏡而獨返彼
銅山之可傷何驕容之無方已築長洲之苑復實海
陵之倉遂稱兵而內侮宜朝起而夕亡原西陵以肇
基始衝梯於士治載為前茅之首實表勤王之師同
薏苡之興謗成貝錦之深疑良弓藏而高鳥盡入不
謙而出不辭遊雷中而徜徉遇日吉而辰良祀公瑾

以桂酒薦忠肅以椒漿實討曹之英策蓋謀桓之祕
方衣披披而屢舞神欣欣而樂康弔劉安於下雉聊
載懷於博史或策杖而龍飛或叱石而羊起將雞鳴
於天上遂埋魂於萬里匪仙道之云偽蓋為仁其由
已經釣臺而高邁過鄂渚而西浮變青門之三襲為
黃塵之一丘城逶迤而中斷階陂陀而半留分沙羨
而啓鎮即開蕃於夏州星尚連於翼軫舍兼分於斗
牛麗滄浪之水清良信美乎濯纓嗟其釣而非釣復

何慮而何營羌有願而不獲拂蘭橈而上征冬已謝
而春辭聊方舟而水嬉看白沙而似雪望却月而成
睂臨石渚其如鏡玩弱柳其猶絲停赤壁而延佇聊
愴望而方思吳水鄉之舟楫魏陸產之臯貌本吳長
而魏短況地利與天時結憤風而炎上燎原火於驚
颼灰霧霏而擊馬箭參差而麗龜成班車之逸氣碎
當途於鹿麋分洞庭於吳上限東益於巴丘如溜湏
之相別似涇渭之分流雖滔滔而直瀉終耿耿而橫

浮想蘭香之薦枕懷娥皇之夜遊若夫子瑜設險之
記閭遨游泳之地既下車而踐境早詢求於方志曉
泊鬻拳之津夕瞻荒谷之寺居柳下而布德坐棠陰
而高視班六條於宰邑賢十部於從事每題輿於仲
舉豈虛名乎叔治藉務隙於登臨乃紛吾之本志時
復設羽蓋揚旌旆乘雕玉從貝帶浮雲起登高唐泛
枉渚望涔陽荊棘生於龍門之下狐兔穴於馬牧之
旁臨章華而流盼見舊楚之淒涼試極目乎千里何

春心之可傷其舊渚宮也夾江帶阡布濩井田通達
交迸高門接連人腰水心之劒家給火耕之田旣追
隨而得性實燕處而超然若平臺之中觀閣相通雄
梁渡水壯翼臨空金堤之路銅鞮之宮閣寫凌霄路
布麗譙橫走馬而為觀擬牽牛而作橋爾乃樹之榛
栗倚桐梓漆三色黃甘千戶朱橘桃蔭井而成蹊萍
浮江而泛實蟬鳴枝而候稻范飛冠而吐蜜復有水
底石髮山筋地骨書帶新抽屏風互發反魂長生靈

壽女貞金鹽玉豉堯韭舜榮交讓之目代謝之名忘
憂長樂枇杷鼓箏竹則簣簋綠菜交戰策皮淚沾虞
后龍還葛陂便娟防露檀欒夾池聊右書而左琴且
繼踵於華陰彼門人之問道各家求而有心先鉛擿
於魚魯乃紛定於陶陰識三家之云謬知五門之可
尋時仰稟於皇猷討巴濮於裨僚乃稜威於華墨出
車檻之云修觀月窟之入附覩日勒之來遊旣虎牙
而成號又龍額而為侯仰皇德之洪深疑朱離於侏

任見白題之蹋鼓看烏孫之學琴獻桂條之良賁奉
桃枝之怪琛嗤聚米於馬援晒畫地於臧旻彼蠢爾
之為鯁伊憑陵而未靜異黃巾於黑山非綠林於青
嶺余喟然以指蹤實濟寬而持猛負步光之文劍驚
漢陽之夕景麾靈琚之左轉光玳簪而右寥白雲生
而陣合紅塵起而軍暗於是驅驕驕命蹶張迴翠蓋
之金瓜臨絳宮之玉堂擬都護之戊己模荆尸之甲
裳作齊軍之減竈數燕師之臥牆觀田畯於虞澤命

車右而前驅猶從戎於細柳若驅馬於長榆矜猿鳴
之抱木傷兔走之依株每愀然而作色方載馳而轉
軾閱放麋而興憫對亂鱗而動惻矧高宴於城隅駐
五馬而踟躕乃有青琴碧玉絳樹綠珠西河王豹東
野繇駒蘭釭夕然合璧斜天照流風之迴雪映出水
之初蓮非吾心之所悅曾未始而流連濫叨榮於分
陝踰一紀之星躔子旣生而冠字嗟留滯以迴遘罷
臨邊之瑞節觀楚黎之臥轍向秋野之蒼茫對寒江

之幽咽散歸雲之鬱鬱翁吐長風之颼颼聞羌笛之哀
怨聽胡笳之淒切慘余袂兮淚成行攀余轅兮不忍
別奉信圭而入朝驅駟馬而乘輶旣總司於戎旅亦
兼飾於豐貂登輦踞而目極忽平原之已超帶方達
之九軌接馳道之三條彼重門之擊柝馮霞起以建
標雜丹樓以藻井間青山於綺寮瞰落星之從龍覩
燿火之迢遙鬱如蓬萊之臨滄海憬如崑崙之出絳
霄函夏之所覲江漢之所朝若夫天不愛道地不愛

寶賓連紫達華平朱草麒麟五色飛兔雙翼集我君
圃之旁游我帝梧之側於斯時也天子郊禘于園丘
高玉簡於東漢邁金版於西周奏蒼璧而服大裘樂
有雲翹之舞牲非繭栗之牛設黃琮而禮地望方澤
乎神州節會咸池之瑄冕無繁露之旒觀三農乎九
穀薦黍稷之種稯命甸師而清塵詔封人而出宿敬
青壇而致虞動翠輅而祈穀時季春之上巳臨祓禊
乎沼沚杏花發於露寒棘實浮於濛汜爰長久之御

節採日精於山趾天策夜而動星鈎陳朝而按軌予
是時也陪玉軼飾金羈驅騶駟躍翠羆乘倜儻控權
奇寶劒昭晰綵朝陸離乍俯馬足時仰月支見靈烏
之占吳觀司南之候離習執鞭而珥筆雖日夕而忘
疲粵重明堂地景已乎正陽乃八牕而四達開上圓
而下方置陰鑒之明水設珪瓚而盈觴諄天官乎冢
宰服端委而辨方虔植物之蒞藻鄙將饗之牛羊藉
鴻私而置傳復推轂而懷方泝蛟川於匯澤沿鵠塞

於潯陽何蠡川之浩浩而匡岫之蒼蒼其匡岫也盤
紆峭崿嶷嶙鬱律峻極於天千霄秀出岑欽崎嶇烏
兔蔽虧崕崕豁開背原面野噴飛流於天末鼓雷霆
於巖下聳高館於雲中聯叢祠於星社雕甍綺閣吁
可畏其欲落雲霧杳冥縈萬嶺而俱青照曜山莊宮
堯石梁鴈門餘帳隆安故牀鏡臨江而分影爐銜花
而共香若乃羽族徘徊察風應雷駕鵞感夢乾鵲知
來露華挾雌而嘯侶銜環帶壘而含猜孔接影而颺

鵬鵠交頸而毳毼爾其彭蠡際天用長百川沸渭渝
溢激淡連延大則浩汗滉漾細則澆灌潺湲遇祈飈
之弗爽彼所報之無愆且搏搖以九萬乍高飈而三
千其中則有澆潏嘉魚燕羽龍鬚戴星含石蒲身雉
軀乍浮圓鏡時泛明珠報蕩子之長信送仙人之短
書恥觀魚而為樂解舒鴈於高繳必冀孔愉之龜當
如噲參之鶴幘衝冠而發憤嗟吾人之施薄觀進退
於我生每篤靖而居貞羞為金谷之富不矯石閭之

清每鞠躬而遵節藉王道之既平貴靜者人所便予得
之於自然非三百之不足惜五十於豐年笑汙斜之行
潦喜甘雨於石田飛新梅於倡粉拂輕絮於房縣月芝
抽而曉落燈花開而夜然菊從風而金散荷帶水而珠
圓已寤歌於折柳復行吟而採蓮課七分與六日推兩
地與參天夕章程而鈎股亦剡注而參連幼墳籍以自
娛迄方今而不渝雲氣芝英之簡懸針倒薤之書緘乎
蒸栗之帙飾乎酸棗之珠擬河獻之留真希淳于之席

珍臨秋水之至樂登春臺而自欣鑿戶牖而長望混木
鴈而兼陳嗟今來而古往聊絕筆於獲麟

哀時命賦

漢嚴忌

哀時命之不及古人兮夫何予生之不遇時往者不可
攀援兮來者不可與期志憾恨而不逞兮抒忠情而屬
詩夜炯炯而不寐兮懷隱憂而歷茲心鬱鬱而無告兮
衆孰可與深謀欲愁悴而委情兮老冉冉而逮之居處
愁以隱約兮志忱抑而不揚道壅塞而不通兮江河廣

而無梁願至崑崙之縣圃兮采鍾山之玉英攀瑤木之
禪枝兮望閭風之板桐弱水汨其為難兮路中斷而不
通勢不能凌波以徑度兮又無羽翼而高翔然隱憫而
不達兮獨徙倚而彷徨悵懣罔以永思兮心紆軫而增
傷倚躊躇以淹留兮日饑饉而絕糧羌抱景而獨倚兮
起永思乎故鄉廓落寂而無友兮誰可與玩此遺芳白
日晚晚其將入兮哀余壽之弗將車旣弊而馬罷兮蹇
澶迴而不能行身旣不容於濁世兮不知進退之宜當

冠崔嵬而切雲兮，劍淋漓而縱橫。衣攝葉以儲與兮，左祛挂於扶桑。右衽拂於不周兮，六合不足以肆行。上同鑿枘於伏羲兮，下合矩矱於虞唐。願尊節而式高兮，志猶卑夫禹湯。雖知困其不改操兮，終不以邪枉害方世。並舉而好朋兮，壹斗斛而相量。衆比周以肩迫兮，賢者遠而隱藏。為鳳凰作鶉籠兮，雖翕翅其不容。靈皇其不寤知兮，焉陳詞而效忠。俗嫉妒而蔽賢兮，孰知予之從容。願舒志而抽馮兮，庸詎知其吉凶。璋珪雜於甌窶兮，

隴廉與孟陬同宮舉世以為恒俗兮固將愁苦而終窮
幽獨轉而不寐兮惟煩懣而盈宵魂眇眇而馳騁兮心
煩冤之懣懣志欲憾而不憺兮路幽昧而甚難塊獨守
此曲隅兮然欲切而永歎愁修夜而宛轉兮氣涸鴻其
若波握剗剗而不用兮操規槲而無所施騁騏驥於中
庭兮焉能極夫遠道置猿狖於櫺檻兮夫何以責其捷
巧駟跛鼈而上山兮吾固知其不能升釋管晏而任臧
獲兮何權衡之能稱篋路雜於廢蒸兮機蓬矢以射革

負擔荷以丈尺兮欲伸要而不可得外迫脅於機臂兮
上革聯於矰弋肩輕側而不容兮固陋腹而不得息務
光自投於深淵兮不復世之塵垢孰魁摧之可久兮願
退身而窮處鑿山楹而為室兮下披衣於水渚霧露濛
濛其晨降兮雲依微而承宇虹霓紛其朝霞兮夕淫淫
而淋雨怡茫茫而無歸兮悵遠望此曠野下垂釣於谿
谷兮上要求於仙者與赤松而結友兮比王喬而為偶
使臯羊先導兮白虎為之前後浮雲霧而入冥兮騎白

鹿而容與魂怔怔以寄獨兮汨徂往而不歸處卓卓而
日遠兮志浩蕩而傷懷鸞鳳翔於蒼雲兮故矰繳而不
能加蛟龍潛於旋淵兮身不挂於網羅如貪餌而近死
兮不如下遊乎清波寧幽隱以遠禍兮孰侵辱之可為
子胥死而成義兮屈原沈於汨羅雖體解其不變兮豈
忠信之可化志忼忼而內迫兮履繩墨而不頗執權衡
而無私兮稱輕重而不差慨塵垢之枉攘兮除穢累而
反真形體白而質素兮中皎潔而淑清時厭飫而不用

兮且隱伏而遠身聊竄端而匿跡兮歎寂寞而無聲獨
便曄而煩毒兮焉發憤而紆情時曖曖其將罷兮遂悶
歎而無名伯夷死於首陽兮卒天隱而不榮太公不遇
文王兮身至死而不得逞懷瑤象而佩瓊兮願陳列而
無正生天墜之若過兮忽爛漫而不成邪氣襲余之形
體兮疾憊怛而萌生願一見陽春之白日兮恐不終乎
永年

哀千里賦

梁江淹

蕭蕭江陰兮荆山之岑北繞琅瑯碣石南馳九疑桂林
山則異嶺奇峰橫嶼帶江雜樹億尺紅霞萬重水則遠
天相逼浮雲共色沄沄無底溶溶不測其中險如孟門
豁若長河參差巨石縱橫龜鼉若乃夏后未鑿秦皇未
闢嶄巖生岸迤邐成跡馳湍走浪漂沙擊石伊孟冬之
初立出首夏以歸來自出國而辭友永懷慕而抱哀魂
終朝以三奪心一夜而九摧徒望悲其何及銘此恨於
黃埃於是鴻鴈既鳴秋光亦窮水黯黯兮蓮葉動山蒼

蒼兮樹色紅思雲車兮沅北望蜺裳兮澧東惜重華之
已沒念芳草之坐空旣而悄愴成憂憫默自憐信規行
之未曠知矩步之已難雖河北之夾塏猶橘柚之不遷
及年歲之未晏願匡坐於霸山

哀江南賦有序

周庾信

粵以戊辰之年建亥之月大盜移國金陵瓦解余乃竄
身荒谷公私塗炭華陽奔命有去無歸中興道銷窮於
甲戌三日哭於都亭三年囚於別館天道周星物極不

反傳燮之但悲身世無處求生袁安之每念王室自然
流涕昔桓君山之志事杜元凱之平生並有著書咸能
自序潘岳之文彩始述家風陸機之詞賦先陳世德信
年始二毛即逢喪亂貌是流離至於暮齒燕歌遠別悲
不自勝楚老相逢泣將何及畏南山之雨忽踐秦庭讓
東海之濱遂餐周粟下亭漂泊高橋羈旅楚歌非取樂
之方魯酒無忘憂之用追為此賦聊以記言不無危苦
之詞唯以悲哀為主日暮塗遠人間何世將軍一去大

樹飄零壯士不還寒風蕭瑟荆壁睨柱受連城而見欺
載書橫階捧珠盤而不定鍾儀君子入就南冠之囚季
孫行人留守西河之館申包胥之頓地碎之以首蔡威
公之淚盡加之以血釣臺移柳非玉關之可望華亭鶴
唳非河橋之可聞孫策以天下為三分衆纔一旅項籍
用江東之子弟人唯八千遂乃分裂山河宰割天下豈
有百萬義師一朝卷甲芟夷斬伐如草木焉江淮無涯
岸之阻亭壁無藩籬之固頭會箕歛者合從締交鉏耰

棘矜者因利乘便將非江表王氣終於三百年乎是知
并吞六合不免軹道之災混一車書無救平陽之禍嗚
呼山嶽崩頽旣履危亡之運春秋迭代必有去故之悲
天意人事可以悽愴傷心者矣况復舟楫路窮星漢非
乘槎可上風颺道阻蓬萊無可到之期窮者欲達其言
勞者須歌其事陸士衡聞而撫掌是所甘心張平子見
而陋之固其宜矣

我之掌庾承周以世功而為族經邦佐漢用論道而當

官稟嵩華之玉石潤河洛之波瀾居負洛而重世邑臨
河而晏安逮永嘉之艱虞始中原之乏主民枕倚於牆
壁路交橫於豺虎值五馬之南奔逢三星之東聚彼凌
江而建國始播遷於吾祖分南陽而賜田裂東嶽而胙
土誅茅宋玉之宅穿徑臨江之府水木交運山川崩竭
家有直道人多全節訓子見於純深事君彰於義烈新
野有生祠之廟河南有胡書之碣况乃少微真人天山
逸民階庭空谷門巷蒲輪移談講樹就簡書筠降生世

德載誕貞臣文詞高於甲觀模楷盛於漳濱嗟有道而
無鳳歎非時而有麟既姦回之戾逆終不悅於仁人王
子洛濱之歲蘭成射策之年始含香於建禮仍矯翼於
宗賢遊洊雷之講肆蠡明離之胄筵既傾蠡而酌海遂
測管以窺天方塘水白釣渚池圓侍戎韜於武帳聽雅
曲於文絃乃解懸而通籍遂崇文而會武居笠輶而掌
兵出蘭池而典午論兵於江漢之君拭玉於西河之主
於時朝野歡娛池臺鐘鼓里為冠蓋門成鄒魯連茂苑

於海陵跨橫塘於江浦東門則鞭石成橋南極則鑄銅
為柱橘則園植萬株竹則家封千戶西賁浮玉南琛沒
羽吳歆越吟荆豔楚舞草木之遇陽春魚龍之逢風雨
五十年中江表無事王歆為和親之侯班超為定遠之
使馬武無預於甲兵馮唐不論於將帥豈知山嶽闐然
江湖潛沸漁陽有閭左戍卒離石有將兵都尉天子方
刪詩書定禮樂設重雲之講開士林之學談劫燼之灰
飛辯常星之夜落地平魚鼈城危獸角臥刁斗於滎陽

絆龍媒於平樂宰衡以干戈為兒戲縉紳以清談為廟
略乘漬水以膠船馭奔駒以朽索小人則將及水火君
子則方成猿鶴弊葦不能救鹽池之鹹阿膠不能止黃
河之濁既而魴魚賴尾四郊多壘殿狎江鷗宮鳴野雉
湛盧去國餘腥失水見被髮於伊川知百年而為戎矣
彼姦逆之熾盛久遊魂而放命大則有鯨有鯢小則為
梟為獍負其牛羊之力凶其水草之性非玉燭之能調
豈璿璣之可正值天下之無為尚有欲於羈縻飲其琉

璫之酒賞其虎豹之皮見胡柯於大夏識鳥卵於條枝
豺牙密厲虺毒潛吹輕九鼎而欲問聞三川而遂窺始
則王子召戎姦臣介冑旣官政而離邊遂師言而泄漏
望廷尉之逋囚反淮南之窮寇出狄泉之蒼鳥起橫江
之困獸地則石鼓鳴山天則金精動宿北闕龍吟東陵
麟鬬爾乃桀黠構扇憑陵畿甸擁狼望於黃圖填廬山
於赤縣青袍如草白馬如練天子履端廢朝單于長圍
高宴兩觀當戟千門受箭白虹貫日蒼鷹擊殿竟遭夏

臺之禍終視堯城之變官守無奔問之人干戚非平戎
之戰陶侃空爭米船顧榮虛搖羽扇將軍死綏路絕重
圍烽隨星落書遂鳶飛遂乃韓分趙裂鼓臥旗折失羣
班馬迷輪亂轍猛士嬰城謀臣卷舌昆陽之戰象走林
常山之陣蛇奔穴五郡則兄弟相悲三州則父子離別
護軍慷慨忠能死節三世為將終於此滅濟陽忠壯身
參末將兄弟三人義聲俱唱主辱臣死名存身喪敵人
歸元三軍悽愴尚書多算守備是長雲梯可拒地道能

防有齊將之閉壁無燕師之臥牆大事去矣人之云亡

申子奮發勇氣咆勃實總元戎身先士卒胄落魚門兵
填馬窟屢犯通中頻遭刮骨功業天枉身名埋沒或以
隼翼鷁披虎威孤假沾漬鋒鏑脂膏原野兵弱虜強城
孤氣寡聞鶴唳而心驚聽胡笳而淚下據神亭而亡戟
臨橫江而棄馬崩於鉅鹿之沙碎於長平之瓦於是桂
林顛覆長洲糜鹿潰潰沸騰茫茫慘黷天地離阻人神
慘酷晉鄭靡依魯衛不睦競動天關爭迴地軸探雀穀

而未飽待熊蹯而詎熟乃有車側郭門筋懸廟屋鬼同
曹社之謀人有秦庭之哭爾乃假刻璽於關塞稱使者
之酬對逢鄂坂之譏嫌值郾門之征稅乘白馬而不前
策青驃而轉礙吹落葉之扁舟飄長風於上游彼鋸牙
而鈎爪又巡江而習流排青龍之戰艦鬪飛燕之船樓
張遼臨於赤壁王濬下於巴丘乍風驚而射火或箭重
而回舟未辨聲於黃蓋已先沈於杜侯落帆黃鶴之浦
藏船鸚鵡之洲路已分於湘漢星猶看於斗牛若乃陰

陵失路釣臺斜趣望赤壁而沾衣機烏江而不渡雷池
柵浦鵲陵焚戍旅舍無煙巢禽無樹謂荆衡之杞梓庶
江漢之可恃淮海維揚三千餘里過漂渚而寄食託蘆
中而渡水屈於七澤濱於十死嗟天保之未定見殷憂
之方始本不達於危行又無情於祿仕謬掌衛於中軍
濫尸丞於御史信生世等於龍門辭親同於河洛奉立
身之遺訓受承書之顧託昔三世而無慙今七葉而方
落泣風雨於梁山惟枯魚之銜索入欹斜之小徑掩蓬

翟之荒扉就汀洲之杜若待蘆葦之單衣於時西楚霸王劍及繁陽鏖兵金匱校戰玉堂蒼鷹赤雀鐵舳牙檣沈白馬而誓衆負黃龍而渡江海潮迎艦江萍送王戎車屯於石城戈船掩於淮泗諸侯則鄭伯前驅盟主則荀瑩暮至剖巢燠穴奔魑走魅埋長狄於駒門斬蚩尤於中冀然腹為燈飲頭為器直虹貫壘長星屬地昔之虎踞龍蟠加以黃旗紫氣莫不隨孤兔而窟穴與風塵而殄悴西瞻博望北臨玄圃月榭風臺池平樹古倚弓

於玉女牕扉繫馬於鳳凰樓柱仁壽之鏡徒懸茂陵之
書空聚若夫立德立言謨明寅亮聲超於繫表道高於
河上更不遇於浮丘遂無言於師曠以愛子而託人知
西陵而誰望非無北闕之兵猶有雲臺之仗司徒之表
裏經綸孤偃之惟王實勤橫琬戈而對霸主執金鼓而
問賊臣平吳之功壯於杜元凱王室是賴深於溫太真
始則地名全節終則山稱枉人南陽校書去之已遠上
蔡逐獵知之何晚鎮北之負譽矜前風颺凜然水神遭

箭山靈見鞭是以螫熊傷馬浮蛟沒船才子併命俱非
百年中宗之夷凶靖亂大雪冤恥去代邸而承基遷唐
郊而纂祀反舊章於司隸歸餘風於正始沈猜則方逞
其欲藏疾則自矜於已天下之事沒焉諸侯之心搖矣
既而齊交北絕秦患西起况背關而懷楚異端委而開
吳驅綠林之散卒拒驪山之叛徒營軍梁溘蒐乘巴渝
問諸淫昏之鬼求諸厭劾之符荆門遭廩延之戮夏口
濫達泉之誅蔑因親以致愛忍和樂於彎弧既無謀於

肉食非所望於論都未深思於五難先自擅於三端登
陽城而避險臥砥柱而求安旣言多於忌刻實志勇而
形殘但坐觀於時變本無情於急難地惟黑子城猶彈
丸其怨則黷其盟則寒豈冤禽之能塞海非愚叟之可
移山况以沴氣朝浮妖精夜殞赤烏則三朝夾日蒼雲
則七重圍軫亡吳之歲旣窮入郢之年斯盡周含鄭怒
楚結秦冤有南風之不競值西鄰之責言俄而梯衝亂
舞冀馬雲屯伐秦車於暢轂沓漢鼓於雷門下陳倉而

連弩渡臨晉而橫船雖復楚有七澤人稱三戶箭不麗
於六麋雷無驚於九虎辭洞庭兮落木去淦陽兮極浦
熾火兮焚旗貞風兮害蠱乃使玉軸揚灰龍文折柱下
江餘城長林故營徒思拊馬之秣未見燒牛之兵章曼
枝以轂走宮之奇以族行河無冰而馬渡關未曉而雞
鳴忠臣解骨君子吞聲章華望祭之所雲夢偽遊之地
荒谷縊於莫敖冶父囚於羣帥劓谷摺拉鷹鷂批攢冤
霜夏零憤泉秋沸城崩杞婦之哭竹染湘妃之淚水毒

秦涇山高趙陁十里五里長亭短亭饑隨蟄燕暗逐流
螢秦中水黑關上泥青於時瓦解冰泮風飛電散渾然
千里淄澠一亂雪暗如沙冰橫似岸逢赴洛之陸機見
離家之王粲莫不聞隴水而掩泣向關山而長歎况復
君在交河妾在清波石望夫而逾遠山望子而愈多才
人之憶代郡公子之去清河相陽亭有離別之賦臨江
王有愁思之歌別有飄飄武威羈旅金微班超生而望
返溫序死而思歸李陵之雙鳧永去蘇武之一鴈空飛

若江陵之中否乃金陵之禍始雖借人之外力實蕭牆
之內起撥亂之主忽焉中興之宗不祀伯兮叔兮同見
戮於猶子荆山鵲飛而玉碎隨岸蛇生而珠死鬼火亂
於平林殤魂遊於新市梁故豐徙楚實秦亡不有所廢
其何以昌有媯之後將育於姜輸我神器居為讓王天
地之大德曰生聖人之大寶曰位用無賴之子弟舉江
東而全棄惜天下之一家遭東南之反氣以鶉首而賜
秦天何為而此醉且夫天道迴旋生民預焉余烈祖於

西晉始流播於東川洎余身而七葉又遭時而北遷提挈老幼闕河累年死生契闊不可問天况復零落將盡靈光歸然日窮於紀歲將復始逼迫危慮端憂暮齒踐長樂之神臯望宣平之貴里渭水貫於天門驪山迴於地市幕府大將軍之愛客丞相平津侯之待士見鐘鼎於金張聞絃歌於許史豈知灞陵夜獵猶是故時將軍咸陽布衣非獨思歸王子

愍時賦

有序

梁宣帝

于謹平梁之後闔城長幼被虜入關又失襄陽故地乃
曰恨不用尹德毅言以致於是又見邑居殘毀干戈日
尋恥威略不振常懷憤懣乃著愍時賦以見其意其辭
曰

嗟余命之殊薄實賦運之逢屯既殷憂而彌歲亦坎壈
而相鄰晝營營而至晚夜耿耿而通晨望否極而反泰
何杳杳而無津悲晉璽之遷趙痛漢鼎之移新無田范
之明略媿夷齊之得仁遂胡顏而苟免謂小屈而或伸

豈妖沴之無已何國步之長淪恨少生而怯弱本無志
於爪牙謝兩章之雄勇恧二策之英華豈三石於鄠杜
異五馬於琅邪直受性而好善類蓬生之在麻冀無咎
而霑慶庶保靜而蠲邪何昊穹之不惠值上帝之紆奢
神州鞠為茂草赤縣遶於長蛇徒仰天而太息空撫襟
而咨嗟伊古人之有懷尚或感於知己况華萼聯於霄
極寵渥流於無已或小善而必褒時片言而見美昔待
罪於禹州歷三考而見紀獲免戾於明時遂超隆於宗

子始解印於稽山即驅傳於襄水彼南陽之舊國實天
漢之嘉祉既川嶽之形勢復龍躍之基址此首賞之謬
及謂維城之足恃值諸侯之攜貳遂留滯於楚川等勾
踐之絕望同重耳之終焉望南枝而灑泣或東顧而潺
湲歸歟之情何極首丘之思邈然忽值魏師入討於彼
南荆既兵車之赫赫俄一鼓而凌城同寤生之舍許等
小白之全邢伊社稷之不泯實有感於生靈伊吾人之
固陋本漂泊於流萍忽沈滯於茲土復歲月而無成昔

千乘之畿甸今七里而盤紫寡田邑而可賦闕丘井而
求兵無河內之資峙同滎陽之未平夜騷騷而擊柝晝
孑孑而揚旌烽連雲而迴照馬伏櫪而悲鳴既有懷於
斯日亦焉得而云寧彼雲夢之舊都乃標奇於昔者驗
往記以瞻今何名高而事寡寂寥井邑荒涼原野徒揄
揚於宋玉空咨嗟於司馬南方卑而歎屈長沙濕而悲
賈余國家之俟匡庶興周而祀夏忽縈憂於此屈豈年
華之天假加以狗盜鼠竊蜂蠆狐狸羣圉隸而為寇聚

臧獲而成師窺臨津渚跋扈江渚屢征肇於殷歲頻戰
起於軒時有扈興於夏典采芑善於周詩方叔振於蠻
貊伯禽捷於淮夷在逋穢其能幾會斬馘而搴旗彼積
惡之必稔豈天靈之可欺交川路之云壅理惆悵而未
怡

抱關賦

有序

宋王回

嘉祐五年回始仕為衛真主簿日負吏責憫已之不如
古人也作抱關賦

抱關之無責兮聊可充吾食兮匪可食兮吾何易兮抱
關之無愧兮聊可由吾仕兮匪可仕兮吾何累兮抱關
之無悶兮聊可託吾遯兮匪可遯兮吾何恩兮

經丘賦

有序

明

石珤

頃在田畷始親稼穡徜徉丘壑亦足驩虞乃知七者之
作意非止於逃塵三農之流事亦兼夫適志樂則生矣
而豈徒哉昔人有言佩玉而心若槁木立朝而意在東
山竊嘗病其失出處之幾為依違之計既非懷蓋以事

君亦宣樂道而忘勢以今觀之他人有心其則不遠容
有若此者也因感淵明崎嶇經丘之語乃作茲賦以寄
興焉

經高丘以騁望兮獨延佇而徘徊遵臥龍之長岡兮陟
呼鷹之故臺覽宜安之廢墟兮拾兜鍪之繡苔懷珠履
之繽紛兮悵頗牧之不來方全趙之有國兮固用賢而
得士倚東壤之雄狐兮扼方城之封豕雖韓魏之近交
兮亦勤平而屢盟彼暴秦之虎噬兮又何怪乎縱橫屈

澠池之一擊兮再奪氣於連城終將相之立朝兮不踰
漳而用兵伊振世之豪傑兮徒名存而骨朽宜達人之
大觀兮遽託情於杯酒籍旣猖而興慟兮康又疎而被
戮相五柳之高風兮若停鸞而峙鵠予旣惜今人之分
陰兮又慕往哲之遺躅爰崎嶇而展遊兮抱山頭之黃
犢草茸茸而植杖兮波汎汎而浮舟樂故淵之馳魴兮
矯出谷之鳴鷗念遠遊之旣歸兮存墨貂之敝裘撫伯
牙之孤絃兮感莊叟之犧牛露泥泥以沾衣兮佩凌風

之縹緲逢沮溺之耦耕兮遇丈人之荷蓀洌清泉之可
濯兮瑩石鼓之宜考望唐虞之大廷兮效岡陵之善禱
吾聞志士之未遇兮恒泮渙以徜徉苟吾道之固貞兮
楚非存而凡非亡抱隆中之雙膝兮銷南郡之隱憂馳
九折之畏阪兮凜飛雲之在輶悵蒼生之含望兮蹇東
山之漫遊忽青霄之乘路兮展黃扉之大謀則夫成四
海之式瞻兮固丘壑之所養或廟堂之潤色兮或江湖
之夢想進機衡而霖雨兮退執掌而棲遲惟坎止而流

行兮彼蒼蒼其命之乃知參天薄日之老柏兮固何以
異於秋菊之垂垂

遂虛賦有序

明
盧 柟

姜次渠鄴之良郡貳為要路所忌徵入部士民傷之因
有所賦辭曰

丙辰暮春壯遊鄴都超反隄履平蕪羊腸走險鹿角通
衢蕩陰開其南邯鄲倚其北左引衡漳之浦右據太行
之塞誠京邑之藩屏霸王之區域於是鴻風昌慶雲蔚

大人起神龍會決閭闔兮敘長雲瀰四海兮歷河濱
韓陵兮俯洹野戰亶甲兮紹前勲若乃承流三輔翊戴
王室目牛無全害馬迸跡春秋郊行生物蕃息士女謳
歌鳥獸翔舞式乎四國爾其優游暇豫退食在公瓦雀
行案山鳥下廳青苔繞戶綠樹垂榮窺明月兮虛堂仰
浮雲兮太空佐臥治於淮陽資芳猷乎廣平誠希世之
哲匠乃邁古之化工爾迺梁父鬱興二塗並起靜無寧
波動即覆軌蒼蠅鳴白黑溷市虎張真偽眩巾征車之

闐闐兮去東陽之舊疆歷鸛鷄之荒陂兮赴爛石之崦
岡虎澗罷嘯龍山蔑光瑤草就歇玉琬橫傷風淒其而
啓塗雲翦鬱而飄揚玄猿綠狄睢洟鞞踏排林蹶石羣
呼狂驤於是賓北門張祖宴諸侯來方岳餞征馬鳴雲
旗亂笳鼓競起金石交作絲簧迭奏絃緼憭悵圉軋護
濩發言為酸振衣為喟左右淚落莫敢仰視豺狼嗥兮
路垂鳩臬鳴兮林間欲往從兮不可將獨處兮懷愆爾
乃君門萬里一視無際天閭攬人闐噫鼉負虎豹環繞

鈎蛇傍衛自非飛仙捷徑而分入又孰能排紫宮而謁
上帝於是燕國大夫退而歎曰僕本澹人游心太空涇
渭渾噩出入濛鴻等天地兮山川猶毛髮兮在躬我無
物而不得物無我而弗通總唐許於瞬息齊茵桂於一
終乃今神遊於太玄遂吾虛於無窮為之亂曰若有人
兮乘紫煙入大化兮超蹄筌佩冠劍兮上下昭日月兮
回沿何蚊睫之少虞又奚足為吾芥焉

御定歷代賦彙外集卷四

欽定四庫全書薈要卷一萬七千三百六十四

集部

御定歷代賦彙外集卷五

言志

悼騷賦

陳
梁叔敬

彼仲尼之佐魯兮先嚴斷而後弘行雖離讒以鳴邑兮
卒暴誅於兩觀殷伊尹之協德兮暨太甲而俱寧豈齊
量其幾微兮徒信已以榮名雖吞刀以奉命兮抉目眦
於門閭吳荒萌其已殖兮可信顏於王廬圖往鏡來兮

關北在篇名旣泯沒兮後辟亦然屈平濯德兮潔顯芬
香勾踐臯種兮越嗣不長重耳忽推兮六卿卒強趙殞
鳴犢兮秦人入疆樂毅奔趙兮燕亦是喪武安賜命兮
昭以不王蒙宗不幸兮長平顛荒范父乞身兮楚項不
昌何爾生不先後兮惟洪勲以遐邁服荔裳如朱紱兮
騁變路於奔瀨歷蒼梧之崇丘兮宗虞氏之俊乂臨衆
瀆之神林兮東勅職於蓬碣祖聖道而垂典兮褒忠孝
以為珍旣匡救而不得兮必殞命而後仁惟賈傳其達

指兮何揚生之欺真彼皇麟之高舉兮熙太清之悠悠
臨岷川以愴恨兮指丹海以為期

擬騷賦

有序

宋李綱

昔屈原放逐作離騷經正潔耿介情見乎辭然而託物
喻意未免有譎怪怨懟之言故識者謂體慢於三代而
風雅於戰國乃雅頌之博徒而詞賦之英傑不其然歟
予旣以愚觸罪久寓謫所因效其體據思屬文以達區
區之志取其正潔耿介之義去其譎怪怨懟之言庶幾

不詭於聖人目之曰擬騷其辭曰

帝混沌之苗裔兮歷漢唐而揚英散枝葉於天壤兮遭
五季而遯族於甌閩皇祖隱德而弗耀兮逮吾親而振
名歲昭陽之淵獻兮閏夏甲申吾以降幼倥侗而顓蒙
兮非岐嶷之夙成長遊學於四方兮爰觀光於國賓服
詩禮之嚴訓兮傳忠孝之家聲攬百氏之所長兮味六
經之純精常恐不德以怨及朋友兮慕節義於古人豈
富貴之足志兮冀斯文之可鳴帶長鋏而戎冠兮鏘佩

玉而琚瓊紉蘭蓀之香潔兮服蕙芷之芳馨紛吾旣襲
此衆美兮胡敢自謂之修能誤姓名之上達兮珥史筆
於彤庭侍穆穆之清光兮聞玉音之丁寧入則陪國論
於青瑣兮出則扈屬車之清塵惟丘山之恩厚兮何涓
埃之報輕悼姦邪之亂政兮汨正理而不明竊懷憤而
鬱結兮每欲叩龍墀而力爭惟本朝之寬大兮非有鼎
鑊斧鉞之刑何羣公之噤嘿兮咸卷舌而吞聲因積水
之告災兮爰奏疏而上陳庶一言之悟主兮迴天照之

明明朝抗章而夕貶兮白日不諒予之精誠徒孤忠之耿耿兮任萍梗之飄零絕江淮而歷浙兮割深愛於親庭陟閩山之險阻兮予隻影之伶俜泛吾舟兮建溪弭吾節兮劍浦會計當兮委吏偷燕閑兮莞庫藝蘭蕙兮九畹植松竹兮百畝餐秋菊兮落英飲木蘭兮墜露朝吾游兮翰墨之林夕吾戲兮圖書之府道既不可以行於今兮質聖賢於往古嘉溪山之秀絕兮聊逍遙以容與眺翠嶺兮泛清流桂為楫兮蘭為舟有觴詠兮自適

樂天命兮何憂悼屈原之沈汨兮悲賈誼之不修笑退
之之戚嗟兮憫德裕之窮愁惟君子之出處兮貴體道
以周流自任以天下之重兮何一己之為謀用則行而
舍則藏兮又何必殺身而怨尤惟蓋棺兮事始定聊康
強兮保天性歲寒不失其青青兮惟松柏之獨正信吾
道以優游兮始居易以俟命亂曰已矣乎莫我知也浮
雲蔽日兮虹蜺晝明霜露降此芳草兮百鳥寂而無聲
恐美人之遲暮兮歲道盡而崢嶸側身西望而歎息兮

心鬱結而不平心鬱結兮何為道既不可以散兮斂而
歸之惟靜惟正兮其殆庶幾吾方將與造物者為人兮
又安能踈咸彭之所遺

反反騷賦有序

明 徐禎卿

昔揚雄作反騷論者多過之予閔原之含忠殞鬱且復
獲謗遂援筆慷慨賦反反騷辭曰

稽卬氏之攸肇兮纍楚均之遐飈侯帝頊之流胄兮承
靈澤之汪澈夙陳力於皇軌兮歆仁朗之所廬仄仰吾

均之潔修兮羌引軀以伏羲播昌烈之赫煜兮集衆芳
之霏霏憤遭世之眊濁兮雜紛揚於江之汜在炎漢之
微季兮孰臨岷而悼均投束藻之欲麗兮何理拙而誹
深冤志而抑道兮冀披誦而有明惟帝監之孔嚴兮敢
黨族而誣貞初均幼志於粹清兮乃中情之獨與謇厲
節以植身兮熹浩蕩之修譽進疊疊於中行兮恐日月
之凋邁準前修以共蹈兮遑先時而逆敗約性行以赴
渠兮經五常以綴佩靈修謂其允淑兮目成歡而叶妃

夫均既沐靈修之昵澤兮又信言之噲噲苟中路而遷
好兮寧余心之有介汎光華之的皪兮衆睂睂而妒之
何有懼讒與招慝兮排蛾眉而錯之颺蕙服之芬郁兮
遭紛媚而幽毀寧遭幽以迸斥兮敢詭汙而合穢鳳凰
翔林而挂網兮龍行陸而困蟻為鳳凰神龍豈無知兮
亦處身之多虞所貴賢者之韞玉兮不迷邦而遐舉哀
宗社之不長兮比干皇皇而不忍去世蔑復以相明兮
心耿耿以無從涉湘波以南遡兮昭均心之確忠俗叢

蕭而鄣蘭兮實重華之所醜効精白以殞軀兮自先聖
之所厚奉靈氛之玄筮兮申以巫咸之嘉告覽九州以
求匹兮寧閨容之有淑測神占其未然兮豈均曾好此
詭疑諗從人以辱義兮不如赴身於淤泥餐秀芬以介
蕙兮竟河清之難俟違苟生以保譽兮夫何悔於九死
汎浮雲之翳翳兮晦沈茫其曷排陽陵微而渝度兮晨
北風又雨霾精徘徊而不去兮憑拙誠其未爽人情重
於捐故兮馬冀白日之回光懷薜蘿與杜蘅兮時不與

其有芳雜緄拉以颺波兮馥烈烈其彌章精氣通於至
清兮神髣髴以憑虛駕玉蚪與雲駉兮訪太素之舊廬
聞至道其可承兮欽均誠之匪懈舍佚遊以自湛兮夫
何以誅其好怪昔貞士之蒙佞兮憤伏斃而靡悔務光
沈於淵瀨兮將惡浮埃之霏霽忠賢忉忉以苦身兮蓋
有隱於隳祚題三仁之所裁兮見歎譽於孔父獨耿耿
而覲侮兮曾吾均之所尤日印懃之惟諉兮駢執正於
陽侯

自悼賦

漢班婕妤

承祖考之遺德兮何性命之淑靈登薄軀於宮闕兮充
下陳於後庭蒙聖皇之渥惠兮當日月之盛明揚光烈
之翕赫兮奉殊寵於增城既過幸於非位兮竊庶幾乎
嘉時每寤寐而糸息兮申佩離以自思陳女圖以鏡鑒
兮顧女史而問詩悲晨婦之作戒兮哀褻閭之為郵美
皇英之女虞兮榮任姒之母周雖愚陋之靡及兮敢舍
心而忘茲歷年歲而悼懼兮閔蕃華之不滋痛陽祿與

柘館兮仍襁褓而離災豈妾人之殃咎兮將天命之不
可求白日忽已移光兮遂晝莫而昧幽猶被覆載之厚
德兮不廢捐於罪郵奉供養於東宮兮託長信之末流
共灑埽於帷幄兮永終死以為期願歸骨於山足兮依
松柏之餘休重曰潛玄宮兮幽以清應門閉兮禁闥扃
華殿塵兮玉階落中庭萋兮綠草生廣室陰兮幃幄暗
房櫳虛兮風泠泠感帷裳兮發紅羅紛綵繡兮紉素聲
神眇眇兮密覲處君不御兮誰為榮俯視兮丹墀思君

兮履綦仰視兮雲屋雙涕兮橫流顧左右兮和顏酌羽觴兮銷憂惟人生兮一世忽一過兮若浮已獨享兮高明處生民兮極休勉虞精兮極樂與福祿兮無期綠衣兮白華自古兮有之

自釋賦

宋
薛士隆

太歲貞於執徐兮涂月季惟方癸農事畢余揆其成兮
秬亢陽與襄水飛符命之全紛兮郡府號余曰有敕緡
泉貨惟四千兮五千杭其以糴越土性而謂余求兮郡

命違其曷可蚤夜民之飼糠粃兮又掇攘之有叵方千
里而為畿甸兮茅葦居其百九人景希兮欲多求之孰
有蓀樵右而左陂兮復前隄而後堰萬斛舟兮望悠揚
而罔見苞苴昌兮根微蠹兮弗充君門狗之吠信信兮
圓月噎於雲霧足余進而趨趨兮矢嘯嘯之靡入思昌
儻而歸印綬兮啜哀傷而雨泣謂何求之喧泯渾兮知
此憂云實鮮余中切而深慮兮羌謂之回遠曹憂民於
以為國兮胡國憂為毋害敢稱民而自佚兮以求其安

秦僥天命之畢罷休兮余心之有得聊遲留兮敷詞而
自釋

解崇賦

有序

唐柳宗元

柳子既謫猶懼不勝其口筮以玄遇干之八其贊曰赤
舌燒城吐水於鉗其測曰君子解崇也喜而為之賦

胡赫炎熏煬之烈火兮而生夫人之齒牙上殫飛而莫
遁旁窮走而逾加九泉焦枯而四海滲涸兮紛揮霍而
要遮風雷唬唬以為橐籥兮回祿煽怒而喊呀炖堪輿

為甌鍬兮熱雲漢而成霞鄧林大椿不足以充於燎兮
倒扶桑落棠膠轕而相叉膏搖脣而增熾兮燄掉舌而
彌葩沃無餅兮撲無簞金流玉鏐兮曾不自比於塵沙
獨淒已而燠物愈騰沸而骹斷吾懼夫灼爛灰滅之為
禍往搜乎太玄之奧訟衆正訴羣邪曰去爾中躁與外
撓姑務清為室而靜為家苟能是則始也汝邇今也汝
遐涼汝者進烈汝者賒譬之猶豁天淵而覆原燎夫何
長喙之紛拏今汝不知清已之慮而惡人之譁不知靜

之為勝而動焉是嘉徒遑遑乎狂奔而西僚盛氣而長
嗟不亦遑乎於是釋然自得以冷風濯熱以清源滌瑕
履仁之實去盜之夸冠太清之玄冕佩至道之瑤華鋪
沖虛以為席駕恬泊以為車瀏乎以遊於萬物者始彼
狙雌倏施而以崇為利者夫何為邪

謫九年賦

唐
劉禹錫

古稱思婦已歷九秋未必有是舉為深愁莫高者天莫
濬者泉推以極數無踰九年伊我之謫至於數極長沙

之悲三倍其時廷尉不調行當跂而天有寒暑閏餘三
變朝有考績明幽三見顧堯之民兮亦昏墊而有歎歎
息兮徜徉登高高兮望蒼蒼突弁之夫我來始黃合抱
之木我來猶芒山增昔容水改故坊童者鬱鬱兮涸者
洋洋天覆地生菊兮無傷彼族而居鄉之投荒彼軒而
遊昨日析楊信及澤濡俄然復常稽天道與人紀咸一
償而一起去無久而不還焚無久而不理何吾道之一
窮兮貫九年而猶爾噫不可得而知庸詎得而悲苟變

化之莫及乎又安用夫肖天地之形為

問大鈞賦

有序

唐
劉禹錫

始余失臺郎為刺史又貶州司馬俟罪朗州三見閏月
人咸曰數之極理當遷焉因作謫九年賦以自廣是歲
臘月詔追明年自闕下重領連山郡印綬人咸曰美惡
周必復第行無恤歲杪其復乎居五年不得調歲二月
有事於社前一日致齋孤居慮靜滯念數起伊人理之
不可以曉也將質諸神乎謹貢誠馳精敢問大鈞其夕

有遇寤而次第其辭以為賦

圖方相玉兮浩其無垠
宵冥翕闢兮走三辰以騰振孰
主張是兮有工其神迎隨不見兮強名之曰大鈞
鼓以臨下兮巍乎雄尊
天為獨陽高不可問
工居其中與人差近
身執其權心平其運
循名想像或可以訊
曰嘻蒙之未生其猶泥耳
落乎埏埴唯鈞所指
忽然為人為幸大矣
工賦其形七情與俱
嗇智不受畀之以愚
坦坦之衢萬人所趨
蒙一布武化為畏塗
人或譽之百說徒虛

人或排之半言有餘物壯則老乃唯其常否終則傾亦
不可長老先期而驟至今否踰數而叵量雖一夫不獲
兮亦大化之攸病謹薦誠上問兮俛伏以聽是夕寢熟
夢遊乎無何有之鄉抗陛紱乎重霄兮異人間之景光
中有威神巾金巾而煒煌命之使前兮其音琅琅曰吾
大化之一工也居上臨下廉其不平汝今有辭吾一以
聽播形肖貌生類積億橐籥圈匡鎔鍊消息我之司智
初不爾嗇不守以愚覆為汝賊既賦汝形輔之聰明盍

求世師資適攸宜胡然抗心遐想前烈倚梯青冥舉足
斯跌韜爾智斧無為自伐鑿竅太繁天和乃洩利遑前
誘多逢覆轍名腸內煎外火非熱今哀汝窮將厚汝愚
剔去剛健納之柔濡塞前竅之傷夷兮招太和而與居
貫以待人兮急以自拘道存壺奧無示四隅軌物之勢
不作兮見傷之機自無汝不善用吾焉嗇乎且夫貞而
騰氣者膺膺健而垂精者昊昊我居其中猶輪是蹈以
不息為體以日新為道俛鱗蜚走灌莽苞阜乃牙乃甲

乃殞乃剖陽榮陰悴生濡死槁各乘氣化不以意造賦
大運兮無有淑惡彼多方兮自生醜好爾奚不德余以
驟壯姑尤我以速老邪觀汝百為又或不然赤子哇哇
忽其能言亦既名物幾時踟躕春耕其丘投種之日釋
耒而歎何時實粟望所未至謂余舒舒欲其久留謂我
瞥如我一子二誰之曲與彼蒹葭之蒼蒼兮霜霰苦而
中堅松竹之皴皴索籜兮不若櫛筍之可憐納材葦而
構明堂兮固容消而力完揚且之暫兮不可以常然當

錫爾以老成蒼眉皓鬚山立時行去敵氣與矜色兮噤
危言以端誠俾人望之侮黷不生爾之所得孰與壯多
不善處老問余而何受教而回遽遽形開嚮之威神孰
為來哉乃遽衣促盥端慮滌想委佩低簪持簿叩顙而
言曰楚臣凡問不訓今臣過幸一獻三售始厚以愚終
期以壽忘上問之罪濯已然之咎心增故術腹飽新授
馳神清玄拜手稽首

三黜賦

宋

王禹偁

一生幾日八年三黜始貶商於親老且疾兒未免乳呱
呱擁泣六百里之窮山唯毒蛇與贋虎歷二稔而生還
幸舉族而無苦再謫滁上吾親已喪几筵未收旅櫬未
葬泣血就路痛彼蒼兮安仰移郡印於淮海信靡盬而
鞅掌旋號赴於國哀亦事居而送往叨四入於掖垣何
寵祿之便蕃今去齊安髮白目昏吾子有孫始笑未言
去無騎乘留無田園羝羊觸藩老鶴乘軒不知我者猶
謂乎郎官貴而郡守尊也於戲令尹無愠吾之所師下

惠不恥吾其庶幾卞和之刖吾乃完肌曹沫之敗吾非
與尸緘金人之口復白圭之詩細不宥兮過可補思而
行兮悔可追慕康侯之晝接兮苟無所施徒錫爾而胡
為效仲尼之日省兮苟無所為雖歎鳳而奚悲夫如是
屈於身兮不屈其道任百謫而何虧吾當守正直兮佩
仁義期終身以行之

三黜賦

以直道事人宜
乎三黜為韻

宋

李

綱

賢若下惠官為士師以直道而從事乃屢黜之為宜忘

已為人何爵祿之足惜舍生取義豈威武之能移法古
守官屈身徇道位雖卑而道何所辱義或失則位焉敢
保寧尸祿以素餐將啜菽以忘老君違必諫雖犯顏而
何傷天聽孔昭恐獲罪之難禱何則忠以得罪分焉所
甘以所守之惟一故遭黜而至三用則行而舍則藏顧
有進則有退仰不愧而俯不怍夫何懼而何慙枉道事
人奚必去父母之國直心行道焉往無譖愬之談惟君
與臣代天理事各盡其職非相為賜諫行言聽固同享

於安榮道廢身藏亦何心於怨懟惟知則止之節乃盡
事君之義相彼君子異乎小夫以容悅得君為至計以
緘默固位為良圖蓋亦陋矣何足算乎老柏千年凡幾
經於凝沍精金百鍊乃可試於洪爐惟此展禽雅安降
逸雖不辭於小官亦弗免於三黜蓋以和制行者所以
與人為徒以直事人者所以本天之質類夫子文之稱
忠喜怒不形於仕已有得孟軻之不動榮辱豈存乎得
失矧乃作士利用刑人上下其手而楚國以弊輕重其

心而漢法以淪徐有功之任司刑守法而代人以死張
釋之之為廷尉讞獄而舉世推仁蓋聞風而有立雖愈
久而彌新爰有畸人號為拙直荷三朝之眷遇辜負明
恩雖九謫而終歸敢忘大德惟內省不疚於聖言顧用
舍豈繫於人力味前哲之遺風每撫篇而太息

謫居賦

宋
張九成

嗟余之生兮西湖之濱煙雲為家兮風月為鄰一行作
吏兮喪厥真筮仕會稽兮繼命奉常著作東觀兮出持

刑章未及佩印兮讒口傷世路險巇兮人情澆薄拂衣
歸來兮求志獨樂溫詔三下兮辭不獲卿宗正兮侍玉
座談堯舜兮上盛古小宗伯兮義則可知難而退兮奉
偏親庭闈之樂兮如三春奇禍作兮湘江奔天忽歿兮
骨欲折心糜潰兮目流血日月馳兮成永訣禍又作兮
事更危天心仁兮哀憐之免余死兮竄江西維茲地兮
古橫浦嶺之北兮江之潯團瘴煙兮飛霧雨七年於茲
兮無與晤語俗目並觀兮吾何以處惟吾早聞道兮傳

孔孟用聖心兮履聖行曰君子謹獨兮無愧怍聖人樂
天兮無適莫夏葛冬裘兮何用美飢食渴飲兮無求備
神明昌兮窮不諱道義重兮物偕逝優哉游哉聊以卒
歲

釋謀賦

宋

王安石

雲冥冥兮蔽日風浩浩兮吹沙出予馳兮不得塊獨處
兮咨嗟嗟天地兮無窮暑與寒兮相客以短褐兮憂親
孰知予兮孔棘維抱關兮擊柝乃予仕兮所宜祿可辭

兮尚冒養孰割兮方虧豈吾事兮固拙寧我辰兮獨悖
信物默兮有制尚可侔兮内外

定觀賦有序

宋陳造

張君錫雱不利秋闈作賦見遺辭意奇壯作定觀賦答
之其辭曰

面頰之數腴胸襟之恢疎譚辯之傾輸子張子眇眇高
蹈力雄萬夫我擘儒於南州闖風壑之於菟揆若人而
當價金華蓬山信其有餘固豈山澤之臞儒也哉胡乃

蘭傷玉缺盤跚蹙蹙黃金注而得昏美璞獻而遭刖撫
劓緼而三歎駭霜蹄之一蹶方且寓喑鳴於雕蟲之技
陶性真於杯中之物陳子曉之曰事之宜然而或不然
者天之勝宜然而不得不然者人之定洞視天人之表
而不吾滑焉君子之善應鄉也覩然笑今也愀然悲蓋
未始得其正彼其搖搖於寵辱之樊皆於理聽之瑩乎
夫聖之逐忠之剖賢也而懼盜也而壽理好乖於所期
是故諉天者得以啓其口羿之射有撥其矢石之斤或

掣其肘然竟非拙工之敢偶蒲梢以一跌而棄夜光以
微累而培孰非市駿藏寶者之咎以定觀之人之勝天
也久矣子其尊所有勉所無勗負文藝之數周旋道德
之塗吾見夫至寶橫道隨和過之必且攘取而疾趨則
夫儻於前而振於後遺之寸而收之尺顧何歎歎彼託
意於酒者古人有之而或以蕩心而敗德聲其怨於文
者君子許之猶未足與語超然自得之徒羌吾言之率
爾子其繹之是邪非乎子張子作而謝之其貌舒舒其

氣愉愉若不知得喪欣戚之何如

遣幽賦

宋張耒

居子子以無與兮出莫知其所之獨端居以終日兮耿
默然而長思古之人不可得而見兮存者滅略之遺辭
顧一世之異情兮余誰者其從之惟我生之拙迂兮嗟
所慕之名奇挹廉清之遺風兮曰吾其進難而退易百
驅不加於跬步兮却轡疾返而莫追踐斯言之不欺兮
庶吾心之無愧日月忽其遷流兮老忽忽而既來惟所

蹈之日迷兮撫前心而自非欲改故而圖新兮從靈龜
而問疑兆改橫而上從兮史謂余而告斯橫為窒而善
處兮上從直達其無巖豈外拘而中泰兮或者既寒而
將遂保爾守而無變兮神明於汝其遺之相利害而為
術兮彼鄉人其猶恥美靈龜之告猷兮我心之所止彼
蹢躅其安往聊安安以自恃歲冉冉以將老兮草木颯
其告衰去蟬號乎高柳兮溢莖菑於清池宵蟲悲鳴以
相語兮朔羽振汎而南窺嗟吾客於東周兮周天星之

三移寫吾憂以命駕兮憑高明以遠視覽平田以茫泱
兮瞰清洛之東駛山重複而南積兮杲嶺矗矗以鱗次
微雲灑霽以忽布兮孤翼滅沒而高遊熊耳高高而西
峙兮女兒奮湧而南危東平川於兩間兮散佃漁於平
地雞犬密其相聞兮溝塍布而如棊牛羊閑以就牧兮
鳥鳥號呼以羣嘻登故國之餘墟兮望遺宮之頽基傷
者來世而無窮兮樂者昔人其既止惟達觀其超忽兮
等廢興於一視考物變以自樂兮遺錢情於酒醴大人

無卽而非樂兮淺夫繫物以自治彼方窘我以局促兮
我則顧步而廣肆制憂樂於在彼兮天何貴乎明智忘
吾憂以洋洋兮將以語夫君子

幽想賦

有序

元
郝經

上卽位之元年詔經更成於宋宋人逆之入置於儀真
姦宄漏國相與構陷誣為款兵不受書命且偽報異聞
者再遂不令進退自庚申至於甲子凡五年冬十有一
月宋人乃報其國喪而復無縱釋之命幽抑無紀極而

莫適赴愬作幽愬賦以自釋辭曰

天明監觀弗蔽兮奠表著以誠陳各蹈道以執則兮于
坦夷兮是循惟禮與信為通達兮俾行李以問津顧率
履之弗越兮何虎尾之啗人棘予裳而梃予車兮竟蠖
屈而莫信滑溟滓以造艱兮胡構台以愆辰習坎而入
於坎窞兮遂蒙幕乎穹旻塊百折而償於下兮墜沈坳
而無極薦局側於智井兮重覆盆而擠石鬱憤默而屯
惛兮觸黜然其若漆踏泥塗以墊隘兮薄湫壤而淫濕

頓濡滯而壅底兮疾重腿以侵賊
混河魚與谷鮒兮麥麴窮兮焉
所得顛連而無攀援兮仰千仞兮
無涯涘責躬而反已兮抑不知其
所自粵台宗之權輿兮兆玄鳥以
降殷託帝乙之支屬兮分方祊於
太原蟬聯而蔓延兮委落族而紛
綸羌台弱植之榮特兮乃繼序乎
其季振迅而自亢兮欲託始以立
世襲皇風之氤氲兮紉幽蘭以為
繫冠章甫之魏我兮錯瓊瑰以為
佩握火齊於天衢兮挽扶桑以載
燧造高朗以正大兮灼羣昧而用

晦攄混沌之滓穢兮萃元精之純粹衣堯兮服舜仁為
旗兮義為軌堅窮而石守兮望道圓而日進絕蹤兮追
塵弗以為遠也探神區而挹道真軼乎無極之近也渴
日而不得留兮乃以夜而為晝葺江籬以為裳兮褰芙
蓉以為袖扈辟芷以揆芳兮濯爛錦而摘繡步驥馱於
康莊兮翥鴻鵠於雲霄越希有而出大荒兮乃度負而
絕遼汎洙泗以揚波兮扇之乎以清飈掇蕙芷而挹瀼
露兮灑旭日而晞蘭苔邁靈修之際嘉兮下弓旌以為

招謂黎元之無告兮久遇毒於荼苦方焦糜於鼎鑊兮
又薦之於刀俎俾顛連之赤子兮化白骨而撐拄血肉
膏於原野兮腐棲苴而橫宿莽閔軀兇而拏蛇虺兮翳
三光而汚九土朕盡焉其傷心兮豈為民之父母汝其
為吾蓋臣兮敷余孚於吳楚轉一氣為陽春兮暴疢魑
為靈雨包載干戈兮朕亦願為好生之主越拜手稽首
兮迺續民命則在乎茲舉畀龍節而錫虎符兮繚霞旌
而凜霜仗遺黎若崩厥角兮將慰乎雲霓之望引餘息

而煦之以天吹兮鼓太和之泱泱變時雍而底定兮鰥
孤廢疾者而有養攀三五以反旆兮輅成康而掉鞅姦
宄遽為之闕塞兮憖不知其故也方血人於齒牙兮盜
憎主人而惡也芟余御而不使之行兮斷予轡於路也
衆梟不識夫鸞皇兮謂予日之暮也啁噪而各為兇聲
兮乃遷台以怒也懷照乘與夜光兮適閭擲而召疑謂
魚目與瓦礫兮乃翻誠以為欺棄神鼎與和氏兮以康
瓠珣珉而為奇如射工之伺人兮故巧發其陰機弗為

社稷之遠猷兮姑詭遇於一時好逆而寇來兮則予焉
所知會衣裳而衷甲兮執魯連為鍾儀薦棘而重圍兮
隔天日兮江之湄遡迴而屯以邐兮設羅畢而為之縻
錮陰谷而高且深兮入而不使之去也為嚇逼之千端
兮覲予改於步也奈予心之不移兮屹乎不周之柱也
倏歲月之屢遷兮春與秋其代謝交一臂而閱之兮身
乃為之傳舍方氣數之締光兮予曷能與之爭天定亦
能勝人兮而偽烏能易余之誠戴片天以兀處兮而豈

能拘余之心欲天飛而道游兮曾不知予身之陸沈冥
搜而坐馳兮迅祥飈而邁往激九萬之扶搖兮歟上征
而遐想將蹇瑤芝於玄臺兮愬於帝而稱罔虎豹乃守
天門兮列魑魅與魍魎犬詵詵而吠人兮闔帝閭而弗
敞仰天而呼兮孰讎吾民而若是之阻修台聖非姬昌
與玄王兮曷為亦在夫夏臺羑里之幽豺虎縱橫兮麟
獲而為囚鱣鯢拉其髻鬣兮乃突梯乎蜃鮪王睢喑而
不鳴兮蜩鳩肆其啁啾雜芳蓀於蘋蘩兮竟不別夫薰

舊日方中而見沫與斗兮蹇予之行孰為此謀挾李順
與苟純兮王驩入室而操矛漏國而倒制兮委而莫予
問也呼天而無與言兮撫予膺而自恨也蹇予業已如
是兮第不忘乎吾民翩然還歸顧自視兮面四壁而無
聞余節弊而增塵兮眇隻影而無倫漫勞心而惛惛兮
輒申旦而弗寐載命龜而虔卜兮復端策而訊筮吉弗
食而數奇兮再三瀆而莫契鬼神亦台違兮予焉得而
請於帝登天而不可兮乃益入於地悠悠靡所薄兮曾

不知其為計望燕雲而不見兮聽哀鴻之嗷嗷靈修不
可以有為兮遽違遠而鬱陶懷猷而孰為矢兮屹魏闕
而夢勞繄眇末有以召是兮祗怨艾而自責必操存之
頗僻兮有菟惡與隱隱無乃不能制欲兮勝於理而不
德亦其饗功而冒進兮任乎重而弗克則亦遂非而崇
侈兮不能執中而過以不及或昧夫幾而闔以顛兮窒
於物而彊以塞孝不能盡親兮忠不能盡於君信不能
及友兮誠不能格夫人是用底於囊跋兮則皆自夫子

身內咎而不敢誰尤兮中隱畏而酸辛第予之所奉行
兮禮人而篤夫動也縱或有以自取兮何為至此極也
戢兵兮止殺則吾君之仁也輸平兮繼好非有惡於渠
也止予兮將焉求則亦荏禍於渠也前修與已事兮可
以鏡視而新是圖親仁兮善鄰乃為國之訏謨合則所
以福吾民兮阻則頓夫師徒繫天誘吾衷兮吾民之禍
庶有豸行人竟何辜兮羌見羈而反害夫澶淵與靖康
兮於得失之跡則固在和安而戰危兮前轍宜以為戒

謂江南之文物兮可以繼夫三代釋子卿而俾之歸兮
乃曾不如匈奴關太和而微倖兮反信用乎矯誣誤國
而不自知兮曾漢唐之不如嗟台身之在天地兮眇太
倉之一粒吾君之命不辱兮死生不足為得失和龍之
赤氣兮豐固有所積也自惜怙私而召亂兮從顛隕而
弗恤也蹇台焉所望兮乃援溺而入於羽淵時不可以
驟合兮竟却走而不前苟非台之所召兮則壤運其自
天顧台所懷之貞珉兮猶未至於玷缺故佩之杜衡兮

有芳荃以為結擷中庭之霜華兮飾之乎吾之節擘江
雲而綴天星兮噫孤風而抱明月吸素霓與清氛兮雖
閤室而益白潔已而莫予污兮挺節而莫予折截玉而
斷鐵兮冽冰而凜雪不欺天而負君兮庶無愧乎前哲
從野馬與塵埃兮溷狐兔而蹠血已地坼而天傾兮猶
不懇予之說在我者亦既盡兮安得復為之喋喋亂曰
與其惡蒙以求明兮曷若靜固以養正兮與其行險以
徼利兮曷若安時而委命兮世固不予知兮謹獨聖之

令也幽所以益吾之修兮屋漏則致予之敬也非予殄
天民之澤兮殃民者固為之穽也

憂釋賦

元 楊維禎

天之何為使聰明而無信兮明畏之無神賢不必福兮
壽不必仁不義而富兮好禮而貧蹠以考終兮聖泣袂
於路麟治綈身於非罪兮冉撓疾於哲人曾日食以萬
資兮侃九餽於旬之期即三葉而不邁兮七世或襲其
遺飽侏儒欲死兮長九尺者飢司造虧羨兮偏既反而

曰迪逆其猶影響兮吾壹不知惠從之所歸匪仁吾弗
依兮匪義吾弗據培德植之翹翹兮願俟時乎吾將茹
夫何好修者見殃兮曰告予以不淑饑饉降喪兮艱我
水菽三釜需養兮風拔庭木言陟於岵兮背樹隨覆填
孰哀其岸獄兮變孰恤其困飢惡青蠅之伺物兮肆射
工而含機紛碩鼠之貪婪兮亦既樂萋楚之無知曾歆
歔而侘傺兮適窮困吾此時也鮮民之不如無生兮何
久處乎此罹也吾令箕伯叱風兮溘乎余將逝也指閭

闔以開闢兮跪數祚於帝也愍夜田以貸恩兮貸車子
以可假感寄輦以泄私兮亦逃資於晝火畀懷鳩以薦
休兮賂銅鈎又為禍漫鑄山以饗餓兮抑富私而不果
彼蒼茫以無端兮固遭遇之無恒既克定其誰憎兮諒
靡人而弗勝逢逆境以順受兮乃先民之所程禍不怨
夫漂瓦兮茫耳外之蜚聲吾何為不豫兮其無以心而
累形曰相訓而助信兮吾將俟久於天人之監明諄曰
棘人樂樂條其歡兮不自先後集百蓼兮輪根屈盤別

利器兮事會輻輳見貞士兮怵迫應物好惡眊兮窟若
囚拘豈識道兮夷險遷乘鱣變化兮泰宇泊然吾何疑
於袞薊兮

御定歷代賦彙外集卷五

謹案卷五第十一頁前七行滯念數起按唐文粹
數作歛

第十二頁前五行中金中而煒煌按唐文粹中金
作金甲

第十三頁後五行楚臣天問不訓按唐文粹訓作
訓





總校官庶吉士臣張能照
校對官編修臣周厚轅
謄錄監生臣徐掄元